

ՀԱՅԿԱԿԱՆ ԼԵՌՆԱՇԽԱՐՀՆ ԸՍՏ ՊՏՂՈՄԵՈՍԻ
ՔԱՐՏԵԶԱԿՐԱԿԱՆ ՏՎՅԱԼՆԵՐԻ

Իոցենտ Մ. Մ. ԽԱՉԱՏՐՅԱՆ

Անցյալի քարտեզների տվյալները առավել մանրամասն ու մասնագիտական սկզբունքով են տրված Կղավգիոս Պտղոմեոսի «Աշխարհագրական ձեռնարկում»¹, որը մինչև այսօր չի օգտագործվել I դարի իրադրությամբ անցյալի ռեգիոնները պատկերելու համար: Պտղոմեոսի «Աշխարհագրական ձեռնարկում» տեղանքի բնաաշխարհագրական մանրամասները տրված են կոորդինատներով՝ աշխարհագրական լայնությամբ ու երկայնությամբ: «Աշխարհագրական ձեռնարկում» լայնության ու երկայնության տվյալներով ներկայացված են Հայաստանի (Մեծ Հայքի) այն ժամանակի 86 բնակավայր, լեռնաշղթաներն ու առանձին լեռների գագաթները, ջրային ցանցը՝ ծովերն ու լճերը, ինչպես նաև վարչական սահմանները, այդ ժամանակ գոյություն ունեցող նահանգները և այլ մանրամասներ: Այդ բոլորը ներկայացված է քարտեզագրական ճշտությամբ, հեղինակը հաշվարկել է համարյա բոլոր կարևոր կետերի աշխարհագրական կոորդինատները այնպիսի ճշգրտությամբ, որ յուրաքանչյուր հատված հնարավոր լինի տեղադրել քարտեզի վրա հարազատորեն:

«Աշխարհագրական ձեռնարկի» ուսումնասիրությունները պարզել են, որ Պտղոմեոսը իր աշխատության տվյալների հիման վրա քարտեզներ չի կազմել և նրա անունով գոյություն ունեցող քարտեզները կազմված են հետագա տարիներին: Մոտավորապես 400 թ. Մարկիան Հերասկը օգտվել է Պտղոմեոսի աշխատությունից, սակայն քարտեզների մասին հիշատակություն չունի²: Նույնը պետք է ասել և «Աշխարհացույցի» վերաբերյալ: Նրա հեղինակը օգտվել է Պտղոմեոսի աշխատության Պապպոս Ալեքսանդրացու համառոտագրած տեքստից, բայց քարտեզների մասին հիշատակություն չունի³: Բազմաթիվ ուսումնասիրություններ են կատարել մեր օրերում Լեո Բագրովը, Մյուլլերը և ուրիշներ, որոնք հանգել են այն եզրակացության, թե «Աշխարհագրական ձեռնարկի» առկա քարտեզները տարբեր դարաշրջանների գործեր են, որ վերագրված են Պտղոմեոսին, սակայն վերծանված են Ագաթագեմունի, Մաքսիմոս Պլանուդեսի և այլոց կողմից⁴:

¹ Պտղոմեոսի «Աշխարհագրական ձեռնարկի» բազմաթիվ ձեռագրերից հրատարակել են Coralus Frid, Augustus Nobbe (Lipsiae, 1813—1845), Coralus Müllerus Voluminus (Parisii, 1881, 1901), E. L. Stevenson (New York, 1932), A. Codazzi (Milano, 1950).

² Տե՛ս M. Heracka, Periplus աշխատությունը:

³ „Армянская география VII века“, издал К. Патканов. А. Соу к р у, Geographie de Moïse de Corene or 1832, 1881.

⁴ L. Bagrow. The origin of Ptolemy's Geographia, Stockholm, 1938, էջ 310—328.

Պտղոմեոսի աշխարհագրական կոորդինատները, ինչպես պարզվում է ներկա ուսումնասիրությամբ, հաշվարկված են իր շափերով փոքր երկրագնդի մակերևույթի վրա՝ ուղեծրերի երկարությամբ (գեոդեզիական եղանակով), ուստի խոշոր մասշտաբի քարտեզ կազմելու դեպքում անցյալում ներկայացված տարածքը չի կարող համատեղվել ներկայիս հաշվումներով ստացված համեմատաբար մեծ երկրագնդի՝ խոշոր շառավիղ ունեցող գնդի մակերևույթի նույն տարածքի հետ։ Անցյալում մասնագետները չեն օգտագործել Պտղոմեոսի տվյալները խոշոր մասշտաբի քարտեզներ կազմելու համար, որովհետև գնդի փոքր լինելը պարզվել է վերջերս միայն։ այդ տվյալները ներկայիս քարտեզագրական ցանցի վրա տեղադրելիս աշխարհագրական մանրամասները իրենց տեղերում չեն ստացվել և խառնիճաղանձ պատկեր է ստեղծվել քարտեզի տարբեր մանրամասների տեղադրումից, որը և ստիպել է հրաժարվել Պտղոմեոսի տվյալներով մեծ մասշտաբի քարտեզներ վերծանելուց։

Պտղոմեոսի ներկայացրած կոորդինատները հաշվարկված են այնպիսի մեծության գնդի վրա, որի շառավիղը շուրջ հազար կիլոմետրով կարճ է ներկայիս հաշվումներով ստացվածից։ այդ հետևանքով Պտղոմեոսի հաշվարկումներում լայնություններն ու երկայնությունները իրականից ղգալիորեն մեծացված են։ Յուրաքանչյուր կետի աշխարհագրական լայնությունն ու երկայնությունը ստացված է ըստ նախորդ կետի կոորդինատների և հեռավորության, բայց որովհետև կետի գիրքը որոշվում էր փոքր գնդի մակերևույթին, առավել երկար գծերի հիման վրա (հեռավորությունները շափված էին իրական երկրագնդի վրա), ապա յուրաքանչյուր հաջորդ կետի համար ստացված էին լայնության ու երկայնության շատ ավելի մեծ թվեր, ուստի սխալները կուտակվում էին և այնքան ավելի մեծ շափով էին հանդես գալիս, որքան սկզբնականից հեռացած էին լինում։

Պտղոմեոսը աշխարհագրական կոորդինատներ հաշվարկելիս երկրագնդի շառավիղն ընդունել է շուրջ 5300 կիլոմետր, մինչդեռ նորագույն հաշվարկումներով երկրագնդի միջին շառավիղը 6371 կիլոմետր է։ Այդ է պատճառը, որ Պտղոմեոսի նախընտրած պարամետրերով երկրագնդի մակերևույթի վրա մեկ աստիճան կենտրոնական անկյամբ ձգված աղեղը, ներկայիս 111,3 կիլոմետրի փոխարեն, ստացվել է 92,5 կիլոմետր⁵։ Այսպես, «Աշխարհագրական ձևերի» Բարադա (ներկայիս Բարալեթի) և Արտեմիտա (ներկայիս Արտամետ) բնակավայրերի աշխարհագրական լայնությունների 3°11' տարբերությունը համապատասխանում է 356 կիլոմետրի (նրանք գտնվում են միևնույն միջօրեականի վրա), ուստի մեկ աստիճան աղեղը ստացվում է 111,3 կիլոմետր։ Սակայն այդ նույն բնակավայրերի՝ «Աշխարհագրական ձևերի» ներկայացված լայնությունների տարբերությունը 3°50' է և այդ տվյալներով Պտղոմեոսի ընդունած երկրագնդի մեկ աստիճան աղեղը ստացվում է 92,5 կիլոմետր։

Այն ուսումնասիրողները, որոնք փորձում են հաստատել, թե VII դարի «Աշխարհացույցը» Պտղոմեոսի «Աշխարհագրական ձևերի» ընդօրինակու-

5 Պտղոմեոսի ընդունած, այսպես կոչվող, ողիմպիական ստադիոնը (ասպարեզը) համապատասխանում է 185 մետրի, որովհետև մեկ աստիճան աղեղը, ըստ Պտղոմեոսի, 500 ստադիոն է։

թյունն է, պետք է նկատի ունենան, որ «Աշխարհացույցի» տեքստում տրված չափադրություններում, կղզիների պարագծերի, հեռավորությունների, ինչպես նաև գրաված լայնությունների ու երկայնությունների չափի միավորը ոչ թե Պտղոմեոսի ընդունած ողիմպիական ասպարեդն է՝ 185 մետրը, այլ այն ասպարեդը, որ համապատասխանում է 158,946 մետրի⁶։

Հայտնի է, որ կիսավարտ վիճակում է թողնվել 1565 թ. Պտղոմեոսի տվյալներով վերծանված պատմական Հայաստանի քարտեզը⁷։ Նույնպիսի վախճան են ունեցել Անգլիայում և Գերմանիայում ձեռնարկված քարտեզագրական աշխատանքները⁸։ Թվարկված բոլոր աշխատանքները մնացել են կիսավարտ ու դադարեցվել են, որովհետև տվյալների լուրջ անհամատեղությունն են հանդիպել քարտեզի յուրաքանչյուր մանրամասնը տեղադրելիս։ Պտղոմեոսի «Աշխարհագրական ձեռնարկում» շարադրված կետերի լայնությունները և երկայնությունները, որ հաշվարկված են փոքր շառավիղ ունեցող գնդի մակերևույթի վրա, քարտեզ վերծանելու նպատակով պետք է նախօրոք ուղղել դիֆերենցիալ հավասարումից ստացված մեծություններով⁹։ Դրանցից մի քանիսի արժեքները ներկայացված են ստորև բերվող աղյուսակներում, մոտավոր ճշտությամբ, ընդհանուր պատկերացում տալու համար, թե ինչպիսի տարբերությամբ են այդ լայնությունները և երկայնությունները համեմատվում մեր օրերի տվյալների հետ։

Աշխարհագրական լայնություններ		Տարբերությունը
Ըստ Պտղոմեոսի	Ներկայիս հաշվարկումներով	
39° 00'	37° 24'	+ 1° 36'
40° 00'	38° 12'	+ 1° 48'
41° 00'	39° 00'	+ 2° 00'
42° 00'	39° 48'	+ 2° 12'
43° 00'	40° 36'	+ 2° 24'
44° 00'	41° 24'	+ 2° 36'

Պտղոմեոսի հաշվարկած աշխարհագրական երկայնությունները երկրագնդի ներկայիս պարամետրերով արտահայտելիս օգտագործված են դիֆերենցիալ ուղղիչ գործակիցներ, որոնք կախված են աշխարհագրական լայնու-

6 «Աշխարհացույցում» Կորսիկա կղզու եզրագիծը 400 մղոն է, Սարգինիա կղզունը՝ 680, իսկ Կրետե կղզունը՝ 330. սակայն Կորսիկա կղզու պարագիծը ներկայիս չափումներով շուրջ 640 կիլոմետր է, Սարգինիա կղզունը՝ 980, իսկ Կրետե կղզունը՝ 500։ Այս եզրահանգումը չափի միավորի վերաբերյալ հաստատված է նաև Սև և Կասպից ծովերի հեռավորությամբ և այլ տվյալներով։

7 Այդ կիսավարտ քարտեզը, լատիներեն մակագրություններով, որ կազմել է Մերկատորը, ներկայացված է Զ. Նանդատյանի Աշխատում (Փարիզ, 1963)։

8 D. M. Lang, Armenia gradle of civilization, London, 1970. E. Simek, Velka Germania, Brno, 1949.

9 Վերահաշվարկման այդ բանաձևերը շարադրված են նաև П. С. Закаров, Курс высшей геодезии (М., 1950, էջ 127) աշխատությունում. փոքր գնդի մակերևույթից որևէ կես փոխանցում են առավել մեծ շառավիղ ունեցող այն գնդի մակերևույթի վրա, որը ներկայումս քննարկված է որպես ուֆերենց սֆերոիդ։

թյուններից: Ուստի ստորև բերվող աղյուսակում պտղոմեոսյան երկայնությունների (72° , 74° , 76° և 78°) այն ժամանակի նշանակությունները տրված են ըստ ներկայիս հաշվարկված $37^{\circ}24'$, $38^{\circ}12'$, 39° , $39^{\circ}48'$, $40^{\circ}36'$ և $41^{\circ}24'$ լայնությունների:

Երկայնությունը ըստ Պտղոմեոսի	Ներկայիս լայնությունները					
	$37^{\circ}24'$	$38^{\circ}12'$	$39^{\circ}00'$	$39^{\circ}48'$	$40^{\circ}36'$	$41^{\circ}24'$
	Ներկայիս երկայնությունները					
$72^{\circ}00'$	$40^{\circ}15'$	$40^{\circ}16'$	$40^{\circ}17'$	$40^{\circ}19'$	$40^{\circ}20'$	$40^{\circ}22'$
$74^{\circ}00'$	$41^{\circ}56'$	$41^{\circ}58'$	$41^{\circ}59'$	$42^{\circ}01'$	$42^{\circ}03'$	$42^{\circ}05'$
$76^{\circ}00'$	$43^{\circ}37'$	$43^{\circ}40'$	$43^{\circ}41'$	$43^{\circ}43'$	$43^{\circ}45'$	$43^{\circ}47'$
$78^{\circ}00'$	$45^{\circ}19'$	$45^{\circ}21'$	$45^{\circ}23'$	$45^{\circ}25'$	$45^{\circ}27'$	$45^{\circ}30'$

Պտղոմեոսի հաշվարկած կոորդինատները դիֆերենցիալ ուղղիչ մեծություններով ուղղելուց հետո հնարավոր եղավ պատմական Հայաստանի բոլոր բնակավայրերը, որոնք նշված էին Պտղոմեոսի «Աշխարհագրական ձեռնարկում», տեղայնացնել ներկայիս բնակավայրերի ու հայտնաբերված ավերակների հետ: Այժմ գոյություն ունեցող քաղաքներից մի քանիսը ճշգրտորեն համատեղվում են Պտղոմեոսի կոորդինատների հետ՝ պահպանելով և այն ժամանակի անունները (Արտամետ, Կապան, Խոյ, Վան, Սղերդ, Սիլվան, Աստապատ, Երվանդաշատ, Սանամեր, Արտաշատ, Արմավիր, Թալին, Կարս, Դսեղ, Բարաձա, Բայկան, Կորցախի, Պիտարեթի, Դարահինի, Սիֆան, Բիանա և այլն¹⁰):

Պտղոմեոսի ներկայացրած բնակավայրերի աշխարհագրական լայնություններն ու երկայնությունները համեմատվել են այժմյան բնակավայրերի կոորդինատների հետ: Այդ տարբերությունները ցուցադրում են Պտղոմեոսի հաշվարկած աշխարհագրական լայնություններում և երկայնություններում առաջացած սխալը: Պտղոմեոսը բնակավայրերի կոորդինատները հաշվարկել է տասը րոպեի ճշտությամբ, ուստի տեղայնացման ընթացքում այդ մեծության տարբերություն ստանալիս չպետք է կասկածել տեղայնացված բնակավայրի տեղագիրքի իսկության վերաբերյալ, որովհետև այդ տարբերությունը որոշ դեպքերում, հավանականության տեսության համաձայն, կարող էր ստացվել կրկնակի, իսկ առավել աննպաստ դեպքերում՝ նաև եռակի մեծությամբ¹¹:

«Աշխարհագրական ձեռնարկում» Պտղոմեոսը նշել է Աբոս անվամբ լեռ, որն ըստ լայնության ու երկայնության համատեղվում է Արարատ լեռան հետ: Պտղոմեոսը հայտնել է, որ «Կորդվաց լեռների կենտրոնը գտնվում է երկայնության $75^{\circ}00'$ ($42^{\circ}50'$) և լայնության $39^{\circ}40'$ ($37^{\circ}48'$) տեղանքում», որ հա-

¹⁰ Այս համատեղությունները հաստատում են մեր այն եզրահանգումները, որոնց հիման վրա հաշվարկված են Պտղոմեոսի տվյալները, ուստի ըստ իս հնարավոր է վերծանել անցյալի ցանկացած ուղեգրի քարտեզը՝ արտածված այդ դրույթների հիման վրա:

¹¹ Բնակավայրերի տեղայնացման, ինչպես և այլ մանրամասների օգտագործման նպատակներով նկատի է առնված նաև Թուրքիայի Ատլասը (A. Tanoglu, Atlas of Turkey, Istanbul, 1964):

մատեղվում է Վանա լճից հարավ գտնվող լեռների հետ¹²։ Կորզվաց լեռների մեջ Պտղոմեոսի մոտ ընդգրկված է նաև Ագարակի լեռնադանգվածը։

Լեռներից ու լեռնաշղթաներից բացի Պտղոմեոսը շեշտել է նաև գետային ցանցը դարձյալ աշխարհագրական կոորդինատների օգնությամբ։ այսպես, «Արաքս գետի ակունքը,— ցրել է Պտղոմեոսը,— գտնվում է Երկայնության $76^{\circ}30'$ և լայնության $42^{\circ}30'$ տեղանքում»։ Ըստ երևույթին Արաքս գետի ակունք է համարվել ոչ թե Բյուրական լեռնադանգվածը, այլ այդ գետի արևելյան վտակներից մեկը՝ Ախուրյանը, երկայնության $44^{\circ}00'$ և լայնության $40^{\circ}11'$ տեղանքը։ Աշխարհագրական այդ տեղադիրքը համատեղվում է Արփի լճի հետ, որ Պտղոմեոսի ժամանակ ըստ երևույթին ընդունված է եղել որպես Արաքս գետի ակունք։

«Աշխարհագրական ձևերնարկում» Պտղոմեոսը Տիգրիս գետի ակունք է նշել, համաձայն կոորդինատների, այդ գետի Կեծան (Արևելյան Տիգրիս — Քեսան) վտակը, որ սկիզբ է առնում Ռշտունյաց լեռներից¹³։

Պտղոմեոսը հիշատակել է մեկ այլ լեռնաշղթա, որը «Եփրատ գետի բեկման տեղում հարում է Եփրատին երկայնության $71^{\circ}30'$ և լայնության $40^{\circ}30'$ կետում»։ Այդ լեռնաշղթայի վերջավորությունը, ըստ Պտղոմեոսի, ձգվում է մինչև երկայնության $77^{\circ}00'$ և լայնության $41^{\circ}00'$ տեղանքը։ այն համապատասխանում է Հայկական Տավրոսին, որ սկսվում է Եփրատ գետի բեկման կետից, երկայնության $30^{\circ}15'$ և լայնության $38^{\circ}23'$ տեղանքից ու շարունակվում մինչև երկայնության $44^{\circ}30'$ և լայնության $38^{\circ}40'$ տեղանքը։

Ըստ Պտղոմեոսի «Պարիադրես լեռնաշղթայի վերջավորությունները գտնվում են երկայնության $75^{\circ}00'$ և լայնության $43^{\circ}20'$, ինչպես նաև երկայնության $77^{\circ}00'$ և լայնության $42^{\circ}00'$ տեղանքում»։ Այդ կետերի կոորդինատներով Պարիադրես լեռնաշղթայի սկիզբը Մեծ Մասիսի ստորոտներն են։ Արաքս գետի ափին, իսկ վերջավորությունը համասեղվում է Մեծրաց (Չախիրբաբ) լեռնաշղթայի վերջում գտնվող Կարմիր Փորակ (Ալահյուաբբեր) լեռների հետ։ Այս տվյալների համաձայն որպես Պարիադրես լեռնաշղթա Պտղոմեոսը ընդունած է եղել Հայկական պարը և որպես նրա շարունակություն՝ Մեծրաց լեռնաշղթան և նրա վերջին լեռնագագաթը։

Պտղոմեոսը նշել է նաև Անտիտավրոս լեռնաշղթան ու հայտնել նրա կենտրոնական կետի կոորդինատները՝ լայնությունը $41^{\circ}40'$ և երկայնությունը $72^{\circ}00'$ ։ Նկատի ունենալով այդ կոորդինատները և Պտղոմեոսի նշումը այն մասին, որ Անտիտավրոսը շարունակվում է Եփրատ գետից այս կողմ, դեպի սլատմական Հայաստանի տարածքը, ակնհայտ է դառնում, որ Բարձր Հայքի լեռները այն ժամանակ անվանվել են Անտիտավրոս։ Լեռնաշղթայի կենտրոնական կետի կոորդինատները համատեղվում են Մերջան (Աղբաբ) դալավի հետ, Բարձր Հայքի լեռների կենտրոնում։

¹² Այստեղ և հետագայում Պտղոմեոսի ներկայացրած լայնությանն ու երկայնությանը կից փակագծերում տրված են նոր կոորդինատները ճշգրտված դիֆերենցիալ ուղղի մեծությունը՝ փոխանցված Երկրաչիղի նոր սլարամետրերով արտահայտված մակերևույթի վրա։ Արաքս։ լեռը Արոս է անվանված նաև А. В. Амфи́театров, Армения и Рим (СПб, 1918) աշխատության 35 էջում, սակայն աղբյուրը չի նշված։

¹³ Տիգրիս գետի ընթացքն, ըստ Ստրաբոնի, շարունակվել է Տոսպ լճի միջով։ Դա պարզապես իշխումացության արգասիք է։

«Աշխարհադրական ձևնարկում» հիշատակված է Ուդակեսպիս լեռնաշղթան, որի կենտրոնական կետի լայնությունն է $40^{\circ}00'$ ($38^{\circ}20'$), երկայնությունը՝ $80^{\circ}30'$ ($47^{\circ}20'$)։ Ուդակեսպիս է կոչվել Քոշաթաղի լեռնաշղթան։

Բագի Տոսպիտիս լճից (ըստ Ստրաբոնի՝ Արսենե) Պտղոմեոսը նշել է նաև Լիքնիտիս լճի երկրաչափական կենտրոնը աշխարհագրական կոորդինատներով, որ համապատասխանում է Սևանա լճի տեղագրությանը։

Պտղոմեոսը Մեծ Հայքի սահմանում նշել է մի երրորդ լիճ ևս, Արսե-սալիմ անվամբ, որը երկրաչափական կենտրոնի աշխարհագրական տեղագրությամբ համապատասխանում է Ուրմիա լճին¹⁴։

Պտղոմեոսի հիշատակած Կասպիոն լեռնաշղթայի հարավի կոորդինատները համատեղվում են Սոհունդ լեռան հետ. նշված լեռնաշղթայի հյուսիսային գագաթի կոորդինատները համատեղվում են Հինալ լեռան հետ։ Այդ երկու խոշոր գագաթների մեջ Պտղոմեոսը ընդհանրացրել է առանձին լեռնաշղթաները մեկ ողնաշարում՝ հյուսիսում Արեգունի և Զանգեզուրի լեռնազանգվածները, իսկ հարավում՝ Ղարադաղի, ապա՝ Սոհունդի լեռնաբազուկները։

Պատմական Հայաստանի այդ ժամանակաշրջանի սահմանները Պտղոմեոսը նշել է ոչ թե աշխարհագրական նկարագրությամբ, այլ ճշտորոշել է տեղում ամրացված քարասյուների 13 կետերի աշխարհագրական կոորդինատներով։ Այդ կետերից առաջինը, կոորդինատների համաձայն, գտնվել է Եփրատ գետի Քյաղթա աջ վտակի դիմաց և բաժանել է պատմական Հայաստանի տարածքը Ասորիքից ու Փոքր Հայքից. սահմանային երկրորդ կետը հղել է Արևելյան Պոնտոս լեռնաշղթայի խուլուրդ գագաթի վրա, Կելկիտ գետի ակունքում և Մեծ Հայքը բաժանել է Փոքր Հայքից ու Կապադովկյան Պոնտոսից։ Սահմանային երրորդ կետը գտնվել է Աճարա-Իմերեթյան լեռնաշղթայի հյուսիս-արևմտյան հատվածում և բաժանել է պատմական Հայաստանը Կոլխիդայից ու Կապադովկյան Պոնտոսից. չորրորդ սահմանային կետով պատմական Հայաստանը բաժանվել է Կոլխիդայից ու Վրաստանից. այդ սահմանակետը գտնվել է Աճարա-Իմերեթյան լեռնաշղթայի վրա, Սուպսա գետի ակունքի մոտ։ Սուրամի լեռնաշղթայի հարավային վերջավորությամբ գտնվում է Կուր գետի ափին է հղել հինգերորդ սահմանակետը։ Վեցերորդ սահմանակետը գտնվել է Աղվանք (Ալազան) գետի աջ ափին, Սղնախ բնակավայրի մոտ և բաժանել է Մեծ Հայքը Վրաստանից ու Աղվանքից¹⁵։

Սահմանային երեք հաջորդական կետերը Կասպից լճի արևմտյան ափին էին, սակայն այն ժամանակ Կասպից լճի ջրի մակարդակը 12,5 մետր բարձր լինելու հետևանքով ներկայիս ափագիծը գտնվել է շուրջ 60 կիլոմետր արևմուտք։ Սահմանային տասներորդ կետը գտնվել է Հաջիչայ գետի աջ ափին, Թավրիդի մոտ և բաժանել է Սյունիք ու Մարդաստան նահանգների Մարաստանից. հաջորդ սահմանակետը գտնվել է Կասպուտան (Ուրմիա) լճի արևմտյան ափին (նախկին Կասբք բնակավայրի տարածքում), բաժանելով

¹⁴ Խորարոնի (մ. թ. ա. 65 թ.—մ. թ. 21 թ.) մոտ այդ լիճը անվանված է Մանտիանա (Կապույտ)։

¹⁵ «Աղվանքի հարավային սահմանի ամբողջ երկարությամբ տարածվում է Հայաստանը, որ հարուստ է դաշտերով ու լեռներով, ինչպես Կոմբյուսենե, որ գտնվում է այնտեղ, ուր Վրաստան, Աղվանք և Հայաստան իրար են կտրում» (Ստրաբոն, Թարգմանեց Հ. Աճառյան, Երևան, 1940, էջ 31)։

պատմական Հայաստանը Մարաստանից ու Ասորեստանից: Սահմանային 12-րդ կետը Տիգրիս գետի ձախ վտակ հաբուրի ափին է եղել և բաժանել է պատմական Հայաստանը Ասորեստանից ու Միջագետքից. սահմանային վերջին՝ 13-րդ կետը գտնվել է Մասիուս լեռնաշղթայի հարավային ստորոտում, այսպես կոչված Արքայական պողոտայի վրա, Մարդինի լեռնանցքում և բաժանել է պատմական Հայաստանի տարածքը Միջագետքից ու Ասորիքից. այդտեղից սահմանը շարունակվել է Ղարաջաղաղ լեռների հարավային ստորոտներով մինչև Եփրատ գետը՝ սահմանային առաջին կետը:

Պտղոմեոսը իր «Աշխարհագրական ձեռնարկում» Մեծ Հայքը ներկայացրել է 23 նահանգներով: Այդ նահանգները նկարագրել է աշխարհագրական տեղագրությամբ, սկսած արևմուտքից դեպի արևելք, հաջորդականությամբ պահպանելով հյուսիսից հարավ. բնակավայրերը խմբավորված են ըստ այդ նահանգների¹⁶:

Պտղոմեոսի տված կոորդինատների ու նկարագրության համաձայն Մեծ Հայքի հյուսիս-արևմտյան անկյունում էր Կատարձեն (ըստ Ստրաբոնի՝ Կաղարջք) նահանգը¹⁷, որ արևմուտքից սահմանակից էր Կապադովկյան Պոնտոսին՝ Պարիսարի (Հադիստանի) լեռնաշղթայով, իսկ հյուսիսում Կոլխիդային՝ Մեսիսթի (Աճարա-Իմերեթյան) լեռնաշղթայով. հարավում՝ Բասիլիսեն նահանգին: Կատարձեն նահանգը արևելքում սահմանակից էր Տոսարեն նահանգին Մոսիսական (Արսիանի) լեռնազանգվածով, իսկ Բոքաս նահանգին՝ Մեղրաբունի (Ճորոխի ու Արսիանի) լեռներով: Կատարձեն նահանգում Պտղոմեոսը նշել է (կոորդինատներով) երեք քաղաք՝ Սուրտա (ներկայիս Շավշատ), Ազատա (Արտվին) և Սալա (Խալա), բոլոր բնակավայրերի տեղանշանումը կատարված է աշխարհագրական կոորդինատների հիման վրա:

Տոսարեն նահանգը արևմուտքում սահմանակից էր Կատարձեն նահանգին, հյուսիսում՝ Իբերիային (Վրաստան)՝ Մեսիսթի լեռնաշղթայով: Արևելքում Տոսարեն նահանգը բաժանված էր Օբարեն նահանգից Սամսարի լեռնաշղթայով մինչև Կուր գետը, իսկ Կոլթեն նահանգից՝ Կարմիր Փորակի և Զարիշատի լեռներով. հարավում Տոսարեն նահանգը սահմանակից էր Բոքաս նահանգին Արսիանի լեռնազանգվածով: Տոսարեն նահանգում Պտղոմեոսը նշել է վեց քաղաք՝ Ասկոհրա (ներկայիս Աժկուրի), Կոձալա (Կործախի), Կոտոմանա (Կուտկալե), Սեղալա (Արտահան, Քաջաց քաղաք), Բարսոձա (Բարալեթի) և Տաստինա (Մերդենիկ):

Օբարեն նահանգը արևմուտքում սահմանակից էր Տոսարենին, հյուսիսում՝ Իբերիային՝ Կուր գետի միջին հոսանքով, արևելքում՝ Օտեն նահանգին՝ Աղստե գետի ընթացքով, հարավում՝ Կոլթեն և Կոտայա նահանգներին՝ Բա-

¹⁶ Բոլոր տվյալները հաստատում են, որ սահմանագծումների աշխարհագրական կոորդինատները Պտղոմեոսի կողմից չեն հաշվարկված, այլ ընդօրինակված են իր ժամանակի պաշտոնական փաստաթղթերից: Հայտնի է, որ Սերասիոն Անտիոքացին, որ Պտղոմեոսից 200 տարի առաջ է ապրել, ճիշտ այդպիսի աղյուսակ է ունեցել իր աշխատությունում. թվական նույն մեծություններով ու նկարագրությամբ (տե՛ս L. Bagrow. The origin of Ptolemy's Geographia, էջ 321):

¹⁷ Պտղոմեոսի ներկայացրած 23 նահանգներն են. Կատարձեն, Տոսարեն, Օբարեն, Սակասեն, Բասիլիսեն, Բոքաս, Կոլթեն, Կոտայա, Սոգուկեն, Օտեն, Ակիլիսեն, Բոլբեն, Բագրևանդ, Մարդոյն, Սիրակեն, Կասպիոն, Աստավնիտիս, Արսեսա, Տոսա, Սոփեն, Անձիտեն, Կորդուեն և Կորիայա:

զուգորդում է լեռնաշղթայով: Օբարեն նահանգում Պտղոմեոսը նշել է չորս քաղաք՝ Լալա (ներկայիս Գանձա), Բատինա (Բավրա), Դիզակա (Դսեղ) և Պտուսա (Պիտարեթի, Յուրտավ):

Սակասեն (Սակաշեն) նահանգի մասին Ստրաբոնը հայտնի է, որ «Կովկասի սակի ցեղերը, զբաղվելով Հայաստանի բարեբեր հողերը, թողել են իրենց անունը այդ շրջանի վրա»․ այդ նահանգը գտնվել է Աղվանք և Կուր գետերի միջև՝ զբաղվելով Կամբեճ (Իորի) գետի երկու ափերի տարածքը¹⁸։ Սակասեն նահանգը հարավից սահմանակից էր Օտեն և մասամբ Օբարեն նահանգներին Կուր գետի ընթացքով, արևելքից եղբրված էր Աղվանք գետի ստորին հոսանքով, հյուսիսից սահմանակից էր Վրաստանին և Կուր ու հրամ գետերի միացման տեղանքից շարունակվում էր հյուսիս-արևելյան ուղղությամբ դեպի Ալազան գետը։ Հյուսիս-արևելքում Սակասեն նահանգը սահմանակից էր Աղվանքին՝ Ալազան գետի հոսանքով մինչև Կուր գետին միանալը։ Պտղոմեոսը այդ նահանգում նշել է երեք քաղաք՝ Սատափարա (ներկայիս Սղնախ), Տոգա (Փոյլի) և Սանտուտա (Սողանլու)։

Մեծ Հայքի հյուսիս-արևմտյան անկյունում էր Բասիլիսեն նահանգը, որ սահմանակից էր հյուսիսում Կապադովկյան Պոնտոսին՝ Խաղտյաց (Լազիստանի) լեռնաշղթայով, հարավում Ակիլիսենին՝ Անահտական, Կապուլտ և Սեղրաբունի (Շակշակի) լեռներով, իսկ հյուսիս-արևելքում՝ Կատարձենին, իր տարածքի մեջ ընդգրկելով Ճորոխ դեռի բաղամվտակ ակունքը։ Բասիլիսեն նահանգում Պտղոմեոսը նշել է երեք քաղաք՝ Աթուա (ներկայիս Բլուր), Վարութա (Իսպիր) և Բրեսոս (Բաբերդ)։

Բոֆաս նահանգը արևմուտքում սահմանակից էր Բասիլիսենին, Կատարձենին և Ակիլիսենին՝ Միրանյաց (Ղարշաբաղարի), ապա Մեղրաբունի, ինչպես նաև Արսիանի լեռնազանգվածներով¹⁹, հյուսիսում՝ Տոսարենին՝ Արսիանի լեռնաշղթայով, արևելքում՝ Կոլթեն նահանգին (մասամբ Կարմիր Փորակ լեռնաշղթայով), հարավում՝ Բուբեն նահանգին՝ Հայկական պարի Սուկավետ և Այծպտկունք (Փալանթոքյանի) լեռնազանգվածներով։ Բոբաս նահանգում Պտղոմեոսը նշել է չորս քաղաք՝ Տինիսա (ներկայիս Թորթում), Խասիրա (Խորասան), Քուրա (Օլթի) և Սանա (Սանամեր)։

Կոլթեն նահանգը արևմուտքում սահմանակից էր Բոբաս և Տոսարեն նահանգներին՝ Ջարիշատ և Կարմիր Փորակ լեռներով մինչև «Հյուսիսային ծովը»՝ Ջըլդր լիճը, հյուսիսում՝ Օբարեն նահանգին՝ Փամբակի լեռնաշղթայով, արևելքում՝ Կոտայա նահանգին՝ սկսած Արփի լճից, Ախուրյան գետի ընթացքով մինչև Հայկական պարը, հարավում՝ Բազրեանդ նահանգին՝ Հայկական պար լեռնաշղթայով։ Պտղոմեոսը Կոլթեն նահանգում նշել է երկու քաղաք՝ Խորսա (ներկայիս Կարս) և Բրիձակա (Արտագերս, Սարիղամիշ)։

Կոտայա (Կոտայք, Կոտեից) նահանգը արևմուտքում սահմանակից էր Կոլթեն նահանգին, արևելքում՝ Սոդուկեն (Սոդք) նահանգին՝ Գեղամա լեռնաշղթայով, հարավում՝ Մարդոյն (Մարդաստան) նահանգին՝ Հայոց ձորի և Փոքր Սասիս լեռնազանգվածի միացման գծով, իսկ Բազրեանդին՝ Հայկական

¹⁸ Այդ նույն սահմաններում է ցույց տրված Սակասեն նահանգը Մխիթարյանների 1849 թ. իրատարակած Ատլասում, Փոքր Այունիք անվամբ։

¹⁹ Բոնիսեր ցեղը, որի անունից առաջացել է Բոբաս նահանգի անվանումը, ապրում էր Նփրատից հյուսիս՝ հունա-հռոմեական հեղինակների մոտ հիշվում է Նաչալ։

պար լեռնաշղթայով: Կոտայա նահանգում Պտղոմեոսը նշել է չորս քաղաք՝ Թալինա²⁰ (Թալին), Արմավիրա (Արմավիր), Արտաքստատա (Արտաշատ) և Դարանիսա (Երվանդաշատ): Վերջինս, ըստ հոբրենացու, գտնվում է «միակտուր ապառաժ բլուրի վրա, որը շուրջ պատում է Երասխր, իսկ դիմացից էլ հոսում է Ախուրյան գետը»²¹:

Սողուկեն (Սողք) նահանգն ընդգրկած է ևղել Սևանա լճի ավազանը²². արևմուտքում Սողուկենը սահմանակից էր Կոտայա (Կոտայք) նահանգին՝ Գեղամա լեռնաշղթայով, հարավում՝ Մարդոյե (Մարդաստան) նահանգին՝ Հայոց ձորի լեռնաշղթայով, իսկ արևելքում՝ Օտեն նահանգին Միափորի լեռնաղանգվածով, նրա Մուրղուզ գագաթով, սպա արևելյան Սևանի լեռների շարքով: Սողուկեն նահանգում Պտղոմեոսը նշել է ևրեք քաղաք՝ Զողաքարա (ներկայիս Գեղարդափանք), Մաթուստանա (Բարձրունի, Մարտիրոս) և Տեբուա (Մոզ բնակավայրի ավերակները):

Օտեն (Ուտիք) նահանգը արևմուտքում սահմանակից էր Սողուկեն նահանգին Միափորի և Սևանի լեռնաշղթաներով, հյուսիսում՝ Օբարեն նահանգին՝ Աղստե գետի ստորին հոսանքով, հարավում՝ Սիրակեն (Սյունիք) նահանգին՝ Հինալ, Գյամիշ և Մուավ լեռներով, իսկ Կասպիոնին (Փայտակարան)՝ Թարթառ գետով մինչև Կուրը: Օտեն նահանգը արևելքում սահմանակից էր Սակասեն նահանգին՝ Կուր գետի ընթացքով: Օտեն նահանգում Պտղոմեոսը նշել է չորս քաղաք՝ Դիսմա (ներկայիս Թոռուզ, որ համատեղվում է Հունարակերտ բնակավայրի հետ ըստ Մղոնաշափքի անալիտիկ տվյալների), Խուլուառա, Արսարատա և Սակալբինա²³:

Ակիլիսեն (Եկեղյաց, Անահտական) նահանգը հարավում սահմանակից էր Աստավնիտիս նահանգին՝ Բարձր Հայքի (Գայլախազուտ—Զեմալդաղ և Ունձուր, Մունգուր) լեռնաշղթայով, հյուսիսում՝ Բասիլիսեն նահանգին՝ Անտիպոնտական լեռնաշղթայով (Անահտական և Կասպույտ լեռներով), հյուսիս-արևելքում՝ Բոքաս նահանգին, իսկ արևելքում՝ Բուբեն նահանգին՝ Մեղեղուխի և Ծիրանյաց լեռներով: Պտղոմեոսը Ակիլիսեն նահանգում նշել է երեք քաղաք՝ Զորիգա (ներկայիս Բազառինջ), էլեգիա (Իլիջա) և Կողանա (Երզնկա):

Բուբեն նահանգը արևմուտքում սահմանակից էր Աստավնիտիս և Ակիլիսեն նահանգներին՝ Սանջարի ու Մեղեղուխի (Շակշակի) լեռներով, իսկ հյուսիսում՝ Բոքաս նահանգին՝ Հայկական պարի Այծպտկունք (Փալանթոքյան), ապա Սուկավետ (Աղրիդաղ) ու Շարհան լեռնաղանգվածներով, արևելքում՝ Արսեսա նահանգին՝ Արածանի գետով, հարավում՝ Անձիտեն (Աղձնիք) նահանգին՝ Հայկական Տավրոս լեռնաշղթայով (Սիմ լեռներով): Պտղոմեոսը Բուբեն նահանգում նշել է ևրկու քաղաք՝ Տարեհինա (ներկայիս Դարահինի) և Քոլուա (Խնուս):

20 Թալինը հիշատակված է և Անանիա Շիրակացու թվաշանական խնդիրներում:

21 Մ ո վ ս ե ս հ ո թ ե ն ա ջ ի. Պատմություն Հայոց, Երևան, 1940, Բ, լթ. էջ 109:

22 Լեն տեղայնացրել է Ծիրակի հետ. ուրարտական սեպագրերում՝ Սուինիսա:

23 Օտեն նահանգում Պտղոմեոսի նշած Խուլուառա բնակավայրը տեղայնացվում է Շամքոր քաղաքից շուրջ չորս կիլոմետր արևելք ընկած ավերակների հետ: Այդ նահանգի Սակալբինա բնակավայրը տեղայնացվում է Գանձակ քաղաքից շուրջ տասը կիլոմետր հարավ-արևելք ընկած ավերակների հետ: Պտղոմեոսի նշած Արսարատա բնակավայրը տեղայնացվում է Մինգեշաուր քաղաքից շուրջ հինգ կիլոմետր հարավ-արևելք ընկած տեղանքի հետ, որ հայտնաբերված են հնագույն ավերակներ:

Բագրևանդ նահանգը արևմուտքում սահմանակից էր Բուբեն նահանգին, հյուսիսում՝ Կոլթեն և Կոտայա նահանգներին՝ Հայկական պարի Շատիկ և Բարգոդյան լեռնաշղթաներով, հարավում՝ Արսեսա և Տոսպ նահանգներին՝ Մաղկանց լեռնաշղթայով, իսկ արևելքում՝ Մարդոյե նահանգին՝ Թափարիզ և Մ. Մասիս դագաթների միացման գծով։ Բագրևանդ նահանգում Պտղոմեոսը նշել է չորս քաղաք՝ Անարիոն (ներկայիս Հին Բայազետ), Զարուհանա (Բազավան), Կիտամոն (Դիագին) և Փավսիա (Խեղիկ)։

Մարդոյե (Մարդաստան) նահանգը արևմուտքում սահմանակից էր Տոսպ նահանգին՝ Կոտուրի (Վասպուրականի) լեռնաշղթայով, արևելքում՝ Սիրակեն (Սյունիք) նահանգին՝ Կասպիոն լեռնաշղթայով, հյուսիս-արևելքում՝ Սոդուկեն նահանգին՝ Հայոց ձորի լեռնաշղթայով²⁴։ Հարավում Մարդոյե նահանգին սահման էր ծառայում Արսեսալիմ (Ուրմիա) լճի հյուսիսային ափագծի փոքր հատվածը, ապա Կորիայա նահանգը՝ Նոր Շիրական լեռնաշղթայով։ Հյուսիսում Մարդոյե նահանգը սահմանակից էր Կոտայա նահանգին՝ Փոքր Մասիսի և Հայոց ձորի միացման գծով, իսկ հյուսիս-արևմուտքում՝ Բագրևանդին Մասիս-Թափարիզի գծով։ Մարդոյե նահանգում Պտղոմեոսը նշել է ութ քաղաք՝ Նաքսուանա (Նախիջևան), Սիզուա (Սինիս), Աստականա (Աստապատ), Խոլիմա (Հեր, Խոյ), Տերեբիա (Արապլար), Դաուդիանա (Մարակերտ), Կոլսա (Կալա) և Մաիպա (Տաշրում, Թոռնավան)։

Սիրակեն (Սյունիք) նահանգը արևմուտքում բաժանված էր Մարդոյե նահանգից Կասպիոն (Զանգեզուրի) լեռնազանգվածով մինչև Հաջիչայ գետը՝ Մարաստանի սահմանը, հյուսիս-արևմուտքում՝ Սոդուկեն նահանգից Արեգունի (Արևելյան Սևանի) լեռներով, հյուսիսում՝ Օտեն նահանգից Մռավի լեռների Գյամիշ լեռնազանգվածով, արևելքում սահմանակից էր Կասպիոն նահանգին՝ Ղարաբաղի սարահարթով մինչև Մարաստան, Մարաստանից բաժանված էր Բավրիզ (Հաջիչայ) գետով, որը մոտավորապես զուգահեռ է Ուղակեսպիա (Քոշաթաղ) լեռնաշղթային և ներկայացնում էր Հայաստանի սահմանը Մարաստանի հետ։ Պտղոմեոսը Սիրակեն նահանգում նշել է չորս քաղաք՝ Զորդոհա (ներկայումս համատեղվում է Զուրդուա ավերակ բնակավայրի հետ), Կապոհտա (Կապան-Ղափան)²⁵, Տիգրանոամա (ըստ երևույթին Տիգրանավան, որ համատեղվում է Ահար բնակավայրի հետ) և Կուբինա (Վայկունիք)։

Կասպիոն (Կասբբ, Փայտակարան) նահանգին²⁶ արևմուտքում սահմանակից էր Սիրակեն (Սյունիք) նահանգը, արևելքից՝ Կասպից լճի արևմտյան ափագիծը, հյուսիսից այն եզերված էր Թարթառ, ապա Կուր գետով մինչև Կասպից լիճը, հարավից սահմանակից էր Մարաստանին։ Կասպիոն նահանգում Պտղոմեոսը քաղաք չի նշել. այդ նահանգում էին գտնվում Փայտակարան և Վարդանակերտ քաղաքները։ Մարաստանի բաժնում տրված բնակա-

²⁴ Նահանգի անվանումը առաջացել է մարդ ցեղի անունից. Ատրպատականից մարդերը գաղթել էին Հայաստան։ Վասպուրականի նահանգում նրանք կաղմեցին ուժեղ նախարարություն (տե՛ս Н. Адонц, Армения в эпоху Юстиниана, էջ 313)։

²⁵ Այս քաղաքի տեղայնացումը կատարված է միայն մեկ ձևադրի տվյալների հիման վրա, մյուս ձևադրերում կոորդինատները այլ են։

²⁶ Այդ ժամանակ Կասպիոն նահանգը գտնվել է Մարաստանի տիրապետության ներքո, ուստի Պտղոմեոսը «Աշխարհադրական ձևանարկում» Կասպիոն նահանգի մասին չարագրել է երկրորդ հատորի 85-րդ էջում։

վայրերի ցանկում այդ քաղաքները բացակայում են. թերևս դրանք III կամ IV դարերի ծնունդ են, որովհետև նշված են «Մղոնաշափքում»²⁷։

Աստավնիտիս (ըստ Ստրաբոնի՝ Փավնիտիս) նահանգը արևմուտքում և հյուսիս-արևմուտքում բաժանված էր Կապադոկիայից (Փոքր Հայքից) Եփրատ գետով, հյուսիսում սահմանակից էր Ակիլիսենին՝ Բարձր Հայքի Գալա-խաղուտ (Ջեմալդադ լեռնաշղթայով, արևելքում՝ Բուբենին՝ Սանջար լեռնաշղթայի երկարությամբ, հարավում՝ Սոփենին (Ծոփք նահանգին)՝ Արա-ծանի գետի ընթացքով։ Պտղոմեոսը այս նահանգում նշել է մեկ քաղաք՝ Կար-իսիլ (ներկայիս Քրզի)։

Արսեսա (Արսիանի) նահանգի անունը, ըստ երևույթին, ստացվել է Արա-ծանի գետից, որ հոսում է այդ նահանգի կենտրոնով. Արսեսան ընդգրկել է Արածանիի ավազանի տարածքը։ Նահանգն արևմուտքում սահմանակից էր Բուբենին՝ Արածանի գետով, Բյուրակն (Բինգյուլ) լեռներով. հյուսիսում՝ Բագրևանդին, արևելքում՝ Տոսսին՝ Սիփան լեռից դեպի Ծաղկանց (Ալադադ) լեռնաշղթան ձգված լեռնաշարքով, իսկ հարավից՝ Աղծնիքին՝ Տավրոսի (Խու-թի) լեռնաշղթայով։ Արևելքում Արսեսա նահանգը տարածված էր մինչև Վա-նա լճի արևելյան և հյուսիս-արևելյան ափագիծը։ Արսեսա նահանգում Պտղո-մեոսը նշել է չորս քաղաք՝ Սողոքարա (ներկայիս Բուլանըխ), Բալիսբիգա (Մուշ), Բաբիլա (Աշտիշատ) և Փանդալիա (Բաթնոց)։

Տոսս (Վասպուրական) նահանգը արևելքում սահմանակից էր Մարդոյե (Մարդաստան) նահանգին Վասպուրականի (Կոթուրի) լեռնաշղթայով. հյուս-սիսում՝ Բագրևանդի նահանգին՝ Ծաղկանց (Ալադադ) լեռնաշղթայով, արև-մուտքից նրա սահմանն էր համանուն Վանա լճի եզրագիծը և Ծաղկանց լեռ-նազանգվածը։ Հարավում Տոսսը սահմանակից էր Կորեայա և Կորդուեն նա-հանգներին՝ Հայկական Տավրոսի լեռնաշղթայով (Կանգուարի և Աղբակ-Մենգենի լեռնազանգվածներով)։ Տոսս նահանգում Պտղոմեոսը նշել է ինը քաղաք՝ Մաիպա (ներկայիս Թոռնավան բնակավայրը), Տասկա (Ոստան), Տոսպիա (Վան), Ազարա (Բերկրի, Մուրադի), Բիանա (Կոթուր)²⁸, Արտեմի-տա (Արտամետ), Փորա (Խոշապ), Սագուանա (Արծկե, Ալջավազ) և Թելբա-լանի (Ադամակերտ)։

Հայաստանի հարավ-արևմտյան անկյունում էր Սովնե (Ծոփք)²⁹ նա-հանգը, որ արևմուտքից եղբրված էր Եփրատ գետի ընթացքով. հյուսիսում Սոփենը սահմանակից էր Աստավնիտիս նահանգին Արածանի գե-տով, արևելքում՝ Անձիտեն (Աղծնիք) նահանգին Տիգրիս գետի՝ Կղեսուրքի լեռնաշղթայից սկիզբ առնող Անբար (Գյոքսու) վտակի ընթացքով՝ ակունք-ներից մինչև գետի արևելք թեքվելը, ապա Անբար վտակի ուղղությամբ մինչև Մասիուս լեռնաշղթան։ Սոփեն նահանգի տարածքում Պտղոմեոսը նշել է չորս քաղաք՝ Մադարա (ներկայիս Ջերմիկ բնակավայրը), Անզիտա (Դիարբեքիր-Ամիդ), Սիավանա (Սիփան) և էլեգերդա (Հայնի)։

27 Հիշյալ քաղաքների տեղադրությունը որոշված է «Մղոնաշափքի» անալիտիկ տվյալ-ներով։ Վարդանակերտի լայնությունն է 39°07', երկայնությունը՝ 47°33'։ Փայտակարանի լայնությունն է 39°54', երկայնությունը՝ 47°40'։

28 Այդ բնակավայրն, ըստ կոորդինատների, համապատասխանում է նաև ներկայիս Կի-րատո, ինչպես նաև Լինչի, Սսվայդի քարտեզի վրա նշված Բիանի բնակավայրին։

29 Աստուրական բևեռագրերում՝ Սուպանի։

Անձիաբեն (Աղձնիք, Հանձիթք) նահանգը տեղադրված էր Սոփիենից (Մոփք) արևելք, Հյուսիսում Բուբեն ու Արսևսա նահանգներից այն բաժանված էր Հայկական Տավրոս լեռնաշղթայով, նրա Սիմ (Կուրտիկ) լեռնազանգվածով և տարածվում էր մինչև Վանա լճի հարավ-արևմտյան եզրագիծը, արևելքում սահմանակից էր Կորդուեն նահանգին Արևելյան Տիգրիս (Ջերմ, Բոհտան), ապա Կեծան (Քեսան) վտակների հոսանքով: Հարավում Անձիտեն նահանգին սահման էր ծառայում Հայաստանի ու Միջագետքի սահմանագիծը՝ Մասիոս լեռնաշղթայի հարավային ստորոտները: Անձիտեն նահանգում Պտղոմեոսը նշել է չորս քաղաք՝ Սոիտա (ներկայիս Սիլվան բնակավայրը), Բելկանիա (Բայկան), Սելգիա (Սեմեկ, Սղերդ) և Արսամասատ (Բնաբեղ): Տիգրանակերտի մասին Պտղոմեոսը ոչ մի տեղեկություն չի տալիս: Պետք է նկատի ունենալ, որ ինչպես հաղորդում է Ստրաբոնը, Լուկուլլոսի արշավանքի հետևանքով քաղաքը վերածվել էր մի փոքրիկ գյուղակի, ուստի և չէր կարող տեղ գտնել «Աշխարհագրական ձեռնարկում»: Տիգրանակերտը քարտեզի վրա տեղադրվելու է Կոստանոյցի «Հռոմեական աշխարհագրատեզի» անալիտիկ տվյալների հիման վրա և համատեղվում է ներկայիս Սելմո կամ Շելմո բնակավայրի հետ³⁰:

Կորդուեն (Կորդուք) նահանգը արևմուտքում սահմանակից էր Անձիտեն նահանգին, հարավում՝ Ասորեստանին՝ Տիգրիսի Արևելյան հաբուր վտակի ընթացքով, ապա Զուգի ու Սերիմադիե լեռներով: Արևելքում Կորդուեն նահանգը բաժանված էր Կորիայա (Կորճայք) նահանգից միջօրեականի ուղղությամբ՝ Ջողա (Ջիլո) բարձր լեռան բազուկներով, մինչև Աղբակի Ականիք (Մերքեղ) լեռնազանգվածը: Կորդուենը Տոսպ նահանգից բաժանված էր Կանգուարի լեռներով՝ մինչև Արտոս լեռը, ապա Վանա լճի հարավ-արևմտյան ափը: Կորդուեն նահանգի հյուսիսային սահմանն էր Վանա լճի հարավային եզրագիծը, սահմանափակված Ռշտունյաց (Շատակ) և Կանգուարի լեռնաշղթաներով: Կորդուեն նահանգում Պտղոմեոսը նշել է յոթ քաղաք՝ Կորրա (ներկայիս Ջեզիրե), Կուխիս (Տմորիք), Գորդուեն (Նարլի), Արտագիգարտա³¹ (Խեզրիշ), Սիայե (Մերվանե), Փերենդիս (Փերվերի, Փինդիկ) և Սարդեվա (Դերավ):

Կորիայա (Կորճայք, Կորտիճայք) նահանգը տեղադրված էր Կորդուենից արևելք: Տոսպ նահանգից այն բաժանված էր Աղբակի, Մարդոյե նահանգից՝ Նոր Շիրականի լեռներով, արևելքից եզերված էր Արսեսալիմ (Ուրմիա) լճի արևմտյան ափագծով: Կորիայան հարավային հատվածում Ասորեստանից բաժանված էր առանձին լեռներ (ինչպես օրինակ, Զորասպի) երկարածոված լեռնազանգվածով, որը միաժամանակ և Հայաստանի սահմանն էր: Կորիայա

³⁰ Ընդունված է, որ Հայաստանի մայրաքաղաք Տիգրանակերտը գտնվել է Սիլվան (ըստ Պտղոմեոսի՝ Սոիտա, իսկ ըստ Կոստանոյցի՝ Սիոտա) բնակավայրի տեղում, սակայն «Հռոմեական աշխարհագրատեզի» տվյալներն ու Պտղոմեոսի կոորդինատներն այդ շեն հաստատում: Իրականում Տիգրանակերտը գտնվել է լայնության 38°07' և երկայնության 41°21' տեղադիրքում:

³¹ Ըստ Ստրաբոնի Կարկաթիոկերտը Մոփքի թագավորանիստ քաղաքն էր, իսկ Մարկավարտը ուղղելով այդ անունը Արկաթիոկերտի, ենթադրում է Անդեզ բերդի ավերակների վայրում, այժմյան էզիլի մոտ, մինչդեռ ըստ կոորդինատների համատեղվում է ներկայիս Խեզրիշ բնակավայրի հետ: Հետաքրքիր է, որ Ստեփան Բյուզանդացին այն անվանում է Արգիշտիկերտ:

նահանգում Պտղոմեոսը նշել է մեկ քաղաք՝ Տիգրանակերտ, որը համապատասխանում է ներկայիս Կալերիշ բնակավայրին:

Պտղոմեոսը ներկայացրել է անալիտիկ տվյալներ Ասիայի երրորդ քարտեզի համար, որ պատկերել է պատմական Հայաստանը մեր թվականություններից առաջ, մոտավորապես I դարի մանրամասնությամբ, տոպոնիմիկայի ու տրանսկրիպցիայի պահպանումով, որ անփոխարինելի նյութ է գիտական ուսումնասիրությունների համար: Պտղոմեոսի տվյալներով վերծանված ու ներկայումս կազմված միևնույն տարածքի աշխարհագրական քարտեզների համադրությամբ հնարավոր է բացահայտել էյկոմենի և նրա ղեկավարների աշխարհագրական միջավայրի դինամիկան: Այդ քարտեզներով հնարավոր է ուսումնասիրել բնապայման էթնիկական խմբերի տեղաբաշխումը, ուղղման եղանակները, ինչպես նաև առևտրական ու ռազմական ճանապարհները:

«Աշխարհագրական ձեռնարկի» կոորդինատների ուղղումը դիֆերենցիալ գործակիցների մեծությամբ և այդ լայնությունների ու երկայնությունների հիման վրա կազմված քարտեզը, տեղագրված Պտղոմեոսի առաջարկած կոնային պրոյեկցիայի ցանցը վրա, կարծում եմ, միակ ամփոփ քարտեզագրական ճշգրիտ իրավիճակ փաստաթուղթը կլինի մեր թվականության I դարի Հայաստանի աշխարհագրական, սոցիալ-տնտեսական, վարչական, պատմական ու այլ հարցեր ուսումնասիրելիս:

АРМЯНСКОЕ НАГОРЬЕ ПО КАРТОГРАФИЧЕСКИМ ДАННЫМ ПТОЛЕМЕЯ

Доцент М. М. ХАЧАТРЯН

(Резюме)

Картографические сведения об Армянском нагорье в «Географическом руководстве» Птолемея изложены при помощи координат, уточняющих местоположение хребтов, отдельных вершин, рек, озер и морей, а также городов, границ и др. По этому уникальному труду, основанному исключительно на аналитических данных, до сих пор не воссозданы исторические карты, так как неизвестны исходные данные, принятые Птолемеем при вычислении координат. Мы установили, что Птолемей вычислял координаты на основе значительно меньших параметров Земли по сравнению с действительными. Начало координат он принимал восточнее Ферро, в 15° от Гринвича, опирая сеть на астрономический пункт в Александрии. Мерой длины служила не римская стадия, а олимпийская (185 м), при 500 стадиях в одном градусе дуги меридиана. Для воссоздания карт по материалам Птолемея необходимо предварительно вычислить поправки к координатам и ввести их сеть в новую систему. Нашими исследованиями «Географического руководства» восстановлены 23 области исторической Армении, существовавшие в первом веке н. э., и созданы необходимые предпосылки для изображения их на современных картах. Кроме того, появилась возможность идентифицировать населенные пункты, представленные Птолемеем при помощи координат, с ныне существующими и существовавшими населенными пунктами Армянского нагорья.